

臺語新詩組 佳作

● 弓蕉 ●

種作一攸金色弓蕉
見證百年來，芳甜飽足的性質
所有眠夢，情節的圓滿
攏因為荖濃溪捌淹過大水
匯入楠梓仙溪胸坎，變做塗糜的肥底
逐日疊懸，情愛的浮崙

你熱帶慾望，有豐沛的水氣沃澹
有時陣，出外走跳是有必要的
掘著深度的思維，離開順事生活
徙栽發穎，予齷齪的風雨教導
規工日曝的考驗，成長的逆境
落肥剪椏，薈著滋開的雜草
骨力疏果佻套袋仔
親像育豸，厝內的寶貝

彎曲肉體，喙笑目笑真膨皮
原裝的身軀，落船來出帆
高雄到橫濱港，是一段飄撇旅途
寬寬仔隱著，青春的弓蕉
為著貴氣的身世，刁工訂做
搭架仔真通風，駛出規路
清芳肥軟的航行
避免跛梢黃過頭，私下來吞忍
運送了後，春天猶原鮮沢當少年

作籼人的衫仔褲，是弓蕉奶染色的地圖
用脈脈長時間彩繪，汗水流失的痕跡
點點滴滴累積，拍拚的證明
旗山街仔路的樓仔厝，壁堵花草百百款
工夫幼路相比並，攏是虬儉的成果
無論一弓抑是一批，種作弓蕉變黃金

有當時仔，時間是薄情的判官
產業競爭甲真劇烈，又閣拄著
葉仔著災來致病，命運宛然失光明
日頭落山，海水沓沓仔退流
浮沉的海面，開始坎坎坷坷
佳哉天無絕人路，好物仔總是有出頭
彎曲的人生，嘛愛學著轉斡的步數
只要有根，著會開花佻結果
親像伊吐团為团死，規穢割煞著愛斬
判了閣暴穎，為序細甘願來拖磨

肥肥的風，吹過肥肥的塗肉
大片的葉仔，慢慢搖文文仔笑
黃黃的皮，色水雅緻真成熟
這是傳承祖先，本土的肉色
剝開弓蕉，白蔥蔥的面容，幼麵麵體質
可比庄跤人，綿爛古意好性地
倚佇風雨中管顧，每一子
金团的前途